



Basler Hiener-Zyttig



Ba-Hi-Z

**DAS ISCH EN UUSZUUG VO
DR HIENER-ZYTTIG MIT
EM «ZEEDEL» VÄRS**

Giggelstadt, 1. Merze 1982

Uusegää vo dr Fasnachtsgsellschaft **KLOSCHTERRÄBE** am Hienerstraich 1982 - Erschti und letschti Uusgoob
Verbandorgan vo dr Gliggligi-Hiener-Gwärggschaft (GHG) Sektion Poules, Poulets und Bybbeli iB.
Fachorgan fir alli Huus-, Hof-, Fäld-, Wald-, Wise-, Broot-, Schnabb-, Durm- und Subbehiener und –Giggel

Chefredagter: Hieronymus Schnabbhaan Bolydigg und Uss[and: Seppi Wyandotte Sport:
Johann Dom-Aier Lokals: Elfride Bybbeli Handel + Finanz: Philipp Misch-Gratzerli Kunst
und Literatur: Sebastian Leghorn Frauesyte: Myneli Pärlhuen Feuilleton: Myggi Hienerbruscht
Kindersyte: Vigg Henn Inserat: Gaggerag AG Prys: 2 Aier, 2 Oeufts, 2 Ove, 2 Ovs.

Adräss: Im Hienerhof 12, 1982 Haanau Drugg + Verlag: Druggerey zem Giggelsaich AG.

The Happy Chicken Song

E Mentsch stoht uff und scho bim z'Morge
bedruggt en Kummer, Gicht und Sorge,
eb Kind, eb Maa, eb alti Frau,
en Ussländer nadyrlig au,
eb Sozi, Schwarz eb Liberaale,
eb in dr Brait, Staine, Spaale,
das, was e Mentsch am liebschte wett,
isch, anstatt uff z'stoh, zruggt ins Bett!
Denn wo-n-er loost, Problem und Strytt
und wo-n-er ummeluegt, git's wyt
und brait nyt Gfraits in däre Stadt.
Dr Mentsch griegt's Mentschsy langsam satt!!
Vyl besser hänn's doo d'Schwyzter Hiener.
Die mien jetz nimme so wie friener
e druurig Stangeläabe fyyre,
am Fliessband Aier produziere,
um schliesslig - nur no Hutt und Gnoche –
als Subbehen im Dampfropf z'köche.
Jä nai, das isch ganz anderscht hitte,
do wärde Paragraphe gritte,
im Dierschutzgsetz haisst's glibb und glaar:
's gitt nur no Gligg fir d'Hienerschar!
Zem Byschbyl selle d'Henne jetze
ihr Ai in Luxusbächer setze,
au griege si am Morge frieh
statt Mais e diggi Haberbrieh,
drzue no Wyssbroot, Angge, Hoonig
fir 's Aierleege als Beloonig.
Noochhär dien si im aigne Kaare
zer Massagekur in d'Sauna faare,

und nämme druff - firnäam und lucky –
dr Lunch y uff em Bruederholz bim Stucky!!
Z'Midaag driffsch - y gang jeedi Wett y –
si an dr Moodeschau vom Spillmaa Freddy.
Und speeter gseesch die Hienersnobbe
im Bruune Mutz bim Oobeschobbe.
Dr Giggel goht in däre Zyt
- wie das bi Giggel dinne lyt –
e Bsuech go mache'z'Leerach ääne,
woo, muess me nit äxtra erwääne!
Druff kasch en - zimlig uff de Wegge –
im Spärber an dr Bar entdegge.
Dert drifft er wiider syni Henne.
Si stelze stramm und gschlosse denne
an d'Veernissage vom E. Am. Eier
sym neyschte Buech: Die Basler Aier.
Persee driffsch unsri Hiener au
als Gescht aa bi dr Muppet-Show.
Druff bsueche si in corpore
e-n-Uffierig vom Schwaanese.
Z'letscht git's - vor em verdiente Pfuus –
e Pique-Nique Gastronome im Schitzehuus!

E Mentsch, wo's sicher duet begriesse,
ass d'Hiener 'sLäbe derfe gniesse,
dä findet, 's wär jetz an dr Zyt,
me miecht au ebbis no fir d'Lyt:
Ych fordere dorum, gopfridstutz,
au e bitz bessre Mentscheschutz!!!

Sebastian Leghorn